

Revisiun totala da la lescha d'alcohol

Opposiziun cunter in scumond da vendita la notg

DA LUCAS DEPLAZES / ANR

■ **Il cussegl naziunal è entrà sin la revisiun da la lescha d'alcohol. En il center da la debatta d'entrada stattan la dumonda da taglia sin l'alcohol ed il scumond da vender bavrondas alcoholicas durant la notg, sco quai che ha decretà il cussegl dals chantuns.**

La lescha davart l'alcohol datescha da l'onn 1932. Quella è vegnida formulada fitg restrictiva perquai ch'il maldiever da l'alcohol aveva procurà per gronds problems en bleras famiglias. Ussa fa il cussegl federal diversas propostas per adattar la lescha a la situaziun dal 21avel tschientaner. La nova lescha regla las cundiziuns da produczion, da l'import e da d'export, mo er las dumondas da taglia sin spirituosas ed etanol. En la nova lescha vul la confederaziun desister da trais monopols e dismetter 41 da 43 lubientschas federalas. Quellas midadas lubeschan da reducir la lavur administrativa. En l'avegnir duai la confederaziun desister d'importar sezza etanol ed extrar sco actur sin il martgà d'etanol. Alcosuisse sco importader e profitcenter da l'administraziun federala d'alcohol vegn privatisà. Cun la revisiun vegn reducida ina gronda part dals pajataglia da 48 000 sin var

3000, senza sperditas per il fiscus. Per reducir in surdiever d'alcohol e las consequenzas negativas sin la giuventetgna ha il cussegl federal integrà diversas mesiras da restricziun per la reclama d'alcohol e per il commerzi.

Massiva opposiziun

Il cussegl dals chantuns ha gia tractà la revisiun e decretà in scumond da vendita per las stizuns tranter las diesch da la saira fin las sis da la damaun. Plinavant vul la chombra pitschna obligar il cussegl federal da fixar pretschs minimalis per bavrondas alcoholicas. Cunter questas restricziuns hai gia dà protestas da diversas varts. Ils exponents fan valair ch'ins possa cumprar bavrondas alcoholicas ordai fer las uras da scumond. En il cussegl dals chantuns ha *Karin Keller-Sutter* (pld/SG) criticà che questa disposiziun mettia tut la populaziun sut curatella. Experientschas cun restricziuns a Genevra demussan dentant ch'in scumond po avair ina sminuziun dals excess d'alcohol.

En la debatta d'entrada ha il pledader da la cumissiun, *Hansjörg Walter* (pps/TG), fatg attent als divers basegns da reveder la lescha totalmain. Unanimain propona la cumissiun d'entrar en

la materia e da refusar las propostas da las minoritads. La nova lescha lubescha da restrenscher la reclama per bavrondas alcoholicas e da promover la prevenziun cunter maldiever. La lescha dat uss als chantuns dapli cumpetenzas ed uschia er la pussaivladad da decretar mesiras pli rigurusas cunter abus d'alcohol. La cumissiun refusa dentant in scumond da vendita durant la notg.

Privilegi per ils purs

La maioritad da la cumissiun vul mantegnair l'excepziun fiscala existenta per ils purs che produceschan vinars ord atgna puma u coclas e per l'agen diever en chasa u en uigl. Quest privileg per l'agricultura duai promover la produziun interna. Davart la taglia sin l'alcohol che porta var 280 milliuns l'onn datti divers parairis. La cumpart da taglia per ils chantuns da var 21 milliuns francs duai restar.

Pledaders da las minoritads han fatg attent che l'alcohol saja la droga numer in en Svizra. Perquai stoppia l'alcohol vegnir sutta mess a mesiras fiscalas pli fermas ed a restricziuns da vendita pli rigurusas. Ina minoritad vul plinavant indosar ils custs medicinalis en cas d'excess d'alcohol als singuls pazients.